

## CAPUT XIX.

## AGNIVARNÆ AMORES.

1. Postquam AGNIVARNAM filium, ignis instar splendentem, ad locum suum occupandum unxerat, RAGHUIDES, eorum qui *vedas* norunt haud ultimus, moderatus, in ultima ætate in *Naimisham* sylvam profectus est.

2. Ibi per aquas sacras oblitus lacuum voluptariorum, per sacra gramina solum tegentia, stratorum, atque per tugurium, palatii regii, sine præmii cupidine castigationes sibi inflixit.

3. Ejus filius haud defatigabatur in regno accepto tuendo, nam pater, qui brachiis suis hostes devicerat, tradiderat ei terram, qua frueretur, non quam adornaret.

4. Libidinosus ille, gentis suæ munere per aliquot annos ipse functus, deinde id ministris commisit, recentemque suam juventutem feminarum arbitrio tradidit.

5. In regis, amore incensi, una cum mulieribus degentis, ædibus, tympanorum strepitu resonantibus, unum diem festum splendidum alter magis splendidus abegit.

6. Ille ne momenti quidem tempus voluptatibus vacuum ferre valens, sed interdiu noctuque in ædibus interioribus sese oblectans, non respexit cives suos, eum videndi cupidos.

7. Atque si quando, ministrorum gravitate motus, civibus suis adspectum suum optatum præbuit, fecit hoc solummodo pedem suum per fenestram iis ostendens.

8. Civesque magna reverentia adorabant hunc, pulchro ipsius ungularum colore tinctum, qui similis erat loto, recentis solis radiis collustratæ.